

不變 ê 應允

迦勒 tī 摩西 ê 面前安慰人民，講：「咱 tiòh 即時去，thang 來得 tiòh hit 所在，咱有夠額 ê 力，會 khah 贏 in。」
(《全民台語聖經》民數記 13：30)

身為一個 bat 做過美國總統 ê 美國人，我意愛講：咱國家 ê 價值 bē 改變。M̄-koh，in 實際上確實是會改變 ê。

最高法院 tī 無仝 ê 時間，用各種方法 teh 解說基本議題。死刑 ê 批准 kah 廢止來來去去，chit-má 有三十五州允准死刑。美國公民受關監 ê 比率比其它國家 khah koân，這是因為刑期 khah 嚴峻 ê 結果。(9/11 以後，公民自由有受 tiòh 限制。) Tī 咱 chit-ê 快速變化 ê 時代，hō 我感覺歡喜 ê 是上帝永遠不變 ê 應允；迦勒 mā 是 án-ne 相信。

Tī 逃離埃及，而且 tī 迦南地 ê 邊 á teh thèng 候 beh 繼承 in ê 新土地 ê 一百萬以上 ê 以色列人中，kan-taⁿ 有兩個人實際上有入去 koh tòà tī hia，迦勒是其中 ê 一個。摩西派十個探 á 去迦南地調查土地，chiah-ê 探 á 講，「咱 bē-tàng 得 tiòh chit-ê 土地，因為這是大漢人 teh tòà ê 所在。無希望 lah！」 M̄-koh，迦勒講實話，憑伊 ê 勇氣 kah 信仰，伊回答講：「有上帝 ê 支持，咱確實 ē-tàng 得 tiòh 應允 ê 土地。」因為迦勒相信上帝，所以摩西對伊講：「你 ê 腳所踏

ê 地，定 tiòh 會歸你 kah 你 ê kiáⁿ 孫，永遠做產業，因為你專心跟 tòe 上主——我 ê 上帝。」(約書亞書 14：9)。Hit-ê 土地結果是屬希布倫 ê；亞伯拉罕 kah 撒拉，以及以撒 kah 雅各 lóng tòà tī hia，mā 埋葬 tī hia。迦勒相信上帝 ê 應允，所以承接 hit-ê 應允 ê 土地。

雖然所有其它 ê 物件 lóng 有可能會改變，獨獨上帝 ê 應允 bē 改變。Siōng 重要 ê 是，耶穌會來做咱 ê 救主。而且，當咱起造咱 ê 活命 tī chit-ê 堅定 ê 應允 ê 時，它 tòh 會 tī 咱所有 ê 日子 hō 咱安定 kah 信心。

祈禱：上主 ah，律法 kah 風俗習慣 tiāⁿ-tiāⁿ teh 改變，致使有時我 kah-ná 是 tī 一個無仝 ê 國家醒起來。我感謝祢 ê 話語 kah 其中不變 ê 應允。求祢教我 án 怎 tī 祢 ê 話語頂面建立我 ê 生活，hō 我 ē-tàng tī chit-ê 世界成功行完我 ê 一生，thang 歸榮光 hō 祢。我 án-ne 奉耶穌 ê 名祈禱。阿們。

(1994.06.05)